

史臣曰大鍾本真陵圓覺寺之物金安老啓于 中廟曰

晨昏之鍾聲微難聽請移此鍾于東南二門之上 中廟允

之於是分掛於東南二門晨昏擊之聲振都城及安老敗後議

者曰安老有不軌之心故有是舉也國姓李也安老姓金也

於五行金克木故掛是鍾於東南東南者屬春夏乃木氣旺

盛之時金以克之是弱木之計也其後撤棄於城上今諫官

請鑄兵器其言是矣 上不從蓋為佛家所用也觀此一事

則其惑於異教可知

戊午弘文館上劄論破大鍾鑄銃筒事不允○夜坤方巽方東

方如火氣京畿陽川有男子雷震死長湍雨雹交下大如大豆

江原道麟蹄雨雹交下大如鳥卵小如榛子經日不消

己未兵營假將柳泗長興假官李壽男棄城遁去賊遂盡取其

軍糧兵器初觀察使金樹以前府使柳泗為假將使守兵營以

碧沙察訪李壽男為假官使守長興府先皆逃去五月二十一

日倭賊五十餘人但持槍劍入兵營盡搜出兵器雜物又取蒸